

МЕСЯЦА ЯНВАРЯ В 2^{ЫЙ} ДЕНЬ.
СЛУЖБА ПРЕПОДОБНОМУ И БОГОНОСНОМУ ОТЦУ НАШЕМУ
СЕРАФИМУ, САРОВСКОМУ ЧУДОТВОРЦУ
НА МАЛЕЙ ВЕЧЕРНИ,

Стихиры на 4, самогласны, глас 4:

Сошедшися днесь, * христоименитии людие, * похвальными песньми венчаим земнаго ангела и небеснаго человека, * и к нему тепле возопиим: * о блаженне отче Серафиме, * постником преславная похвало, * о нас молися ко Господу, * помиловатися душам нашим.

Целомудрие и кротость * от юности возлюбив, * отче Серафиме, * чистотою ума и сердца любовь Христову стяжал еси, * еюже Богови приблизился еси. * Того убо ныне моли, * от бед избавити верою творящия честную память Твою.

Днесь сошедшися христоименитых людей * множества в прославление честных мощей твоих, * преподобне отче Серафиме, * радости и веселия вси исполнишася: * явил бо ся еси болящим исцеление и хромым хождение, * с верою притекающим к раце мощей твоих.

Слава, глас 6:

Веселися и радуйся о Господе, * обитель Саровская: * в тебе бо возсия светильник новый Российския земли. * Красуйся и ликуй Церковь Божия, * и иноков множества сорадуйтеся. * Празднолюбцев собори възграйте, * и венец от духовных цветов сплетше, с Давидом воспойте: * честна пред Господом смерть преподобных Его. * Сия бо преподобному Серафиму * начало славы полагает, * еже общники и нас сотвори твоими молитвами, блаженне.

И ныне, Богородичен: Никтоже притекай:

На стиховне стихиры, глас 2:

Изшед от отечества твоего, * преподобне отче Серафиме, * и града Киева дошед, * тамо у мощей чудотворец на путь спасительнаго * подвига благословение приял еси: * сие убо и нам низпосли, * творящим всесвятую и пречестную память твою.

Стих: Честна пред Господом смерть преподобных Его.

Велий искус в послушании иноческих подвигов, * преподобне отче Серафиме, * с любовию приял еси, * и братию твоим терпением и любовию удивил еси: * моли спастися душам нашим.

Стих: Блажен муж бояйся Господа, в заповедех Его восхоцет зело.

Наставлении игумена укрепляемь, * в пустынное место Сарова вселился еси, отче, * и тамо молитвенному подвигу * крепко прилежати потщился еси, * и явился еси дом Пресвятаго Духа: * моли Христа Бога о всех нас.

Слава:

Наставлении игумена укрепляемь, * в пустынное место Сарова вселился еси, отче, * и тамо молитвенному подвигу * крепко прилежати потщился еси, * и явился еси дом Пресвятаго Духа: * моли Христа Бога о всех нас.

И ныне, Богородичен:

Предстательница и покров Ты еси, Пречистая, * избави нас от бед лютых * и обстояний, * и души наша спаси божественными Твоими молитвами.

Тропарь преподобнаго, глас 4:

От юности Христа возлюбил еси, блаженне, * и Тому единому работати пламенне вожделев, * непрестанною молитвою и трудом в пустыни подвизался еси, * умиленным же сердцем любовь Христову стяжав, * избранник возлюблен Божия Матере явился еси. * Сего ради воишем ти: * спасай нас молитвами твоими, Серафиме, преподобне отче наш.

Богородичен, глас 4:

Еже от века утаенное, * и ангелом несведомое таинство: * Тобою Богородице сущым на земли явися Бог, * в неслитном соединении воплощаемь, * и крест волею нас ради восприим, * имже воскресив первозданнаго, * спасе от смерти души наша.

НА ВЕЛИЦЕЙ ВЕЧЕРНИ.

Блажен муж: На Господи воззвах, стихиры на 8.

Аще убо есть предпразднство святых Богоявлений, पहले поем три стихиры предпразднства: аще же несть сия стихиры, повторяюще первую и вторую,

Глас 1:

Подобен: О дивное чудо:

О, преславное чудо, * подвижник благочестия в Сарове является, * и молитвенник к Богу теплый * Серафим пречудный нам бывает: * веселися, обитель Саровская, * имущи в себе мощи преподобнаго: * възграйте, православных множества, * предивнаго Серафима имуще в бедах заступника и вопиюще к нему: * радуйся, светильниче Российския земли, * тмы сопротивных далече отревай, * и Господеви молися, * даровати душам нашим мир и велию милость.

О дивное чудо, * се бо воистинну во обители Саровстей * благочестия столп непоколебимый Серафим блаженный является нам: * темже, богомудрых собори, на высоту духом возноситеся, * к преподобному вопиюще: * преподобне отче Серафиме, * Господеви молися, * даровати душам нашим мир и велию милость.

Дивны Твоя тайны, Христе Боже, * яко даровал еси нам светильника преподобнаго Серафима, * верным людем на сопротивныя крепкаго поборника, * иноком и всем православным христианом молитвенника, * святей обители похвалу и утверждение: * той и ныне молит Тя, Господи, * даровати душам нашим мир и велию милость.

Егда вшел еси, преподобне, * в пустыню Саровскую, тогда, * своя воли до конца совлекся, * твердое ко всем послушание показал еси: * досады бо и безчестия претерпел еси радуяся: * ударения и раны от злых человек приял еси, * о нихже и молился еси, преподобне: * мы же, прославляюще пречестную память твою, * молим ти ся, преподобне, * Господеви молися мир мирови даровати * и душам нашим велию милость.

Блаженна обитель Саровская, * имуще тебе, преподобне отче Серафиме, * добродетелей сокровище, * сосуд чистоты, целомудрия хранителя, * приятелище благодати, источник исцелений, * болящим врача безмездна, постника истинна, * в скорбех утешителя, * житейскими страстьми обуреваемым тихое пристанище: * нам же, творящим честную память твою, * моли, преподобне отче Серафиме, * даровати мир и велию милость.

Днесь ликують собори верных в память твою, * преподобне Серафиме, * и велегласно вопиют: * ты любви ради Христовы вся красная мира оставив * и в пустыню Саровскую вселився, * никакоже устрашился еси невидимых враг борения: * но сия молитвами твоими яко прах отметал еси: * темже Господеви молися * даровати душам нашим мир и велию милость.

Слава, глас 8:

Приидите, верных собори, * похвальными песньми днесь пречуднаго отца прославим * и сице ему возопиим: * преподобне отче Серафиме, * воистинну сподобился еси божественныя жизни, * приим от Бога венец нетленныя славы. * Сего ради обитель Саровская тобою хвалится, * людие же, зряще честную раку

мощей твоих * и чудеса бываемая, * славят прославляющего тя Господа: * Емуже молися, преподобне, * даровати душам нашим мир и велию милость.

И ныне, предпраздства,

Да возрадуется пустыня Иорданова, * и да процветет яко крин: * глас бо воинощого услышан бысть в ней, * уготовайте путь Господень: * горы бо поставивый ставилом, * и удолия мерилом, вся исполняяй яко Бог, * крещается от раба. * Обнищавати начат богатныя дары даруяй. * Услыша Ева, в печалех родиши чада: * ныне же услыша Дева: * радуйся обрадованная, Господь с Тобою, * имей велию милость.

или Богородичен, глас тойже:

Царь Небесный, за человеколюбие на земли явился, * и с человеки поживе: * от Девы бо Чистыя плоть приемый, * и из Нея прошедый с восприятием. * Един есть Сын, сугуб естеством, * но не Ипостасию. * Темже совершенна Того Бога и совершенна Человека * воистину проповедающе, * исповедуем Христа Бога нашего: * Егоже моли Мати Безневестная, * помиловатися душам нашим.

Вход. Прокимен дне.

Чтения преподобническая 3.

Притчей чтение. [Главы 3 и 8.]

Память праведнаго с похвалами, и благословение Господне на главе его. Блажен человек, иже обрете премудрость: и смертен, иже уведет разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней, и лета живота в деснице ея: в шуйце же ея богатство, и слава. От уст ея исходит правда, закон же и милость на языке носит. Послушайте убо мене, о чада! честная бо реку: и блажен человек, иже пути моя сохранит: исходи бо мои, исходи живота, уготовляется хотение от Господа. Сего ради молю вас, и предлагаю мой глас сыновом человеческим: яко аз премудрость устрой совет, и разум и смысл аз призвах. Мой совет и утверждение, мой разум, моя же крепость. Аз мене любящая люблю, ищущии же мене обрящут благодать. Разумейте убо незлобивии коварство, ненаказаннии же прилагайте сердца. Послушайте мене и паки, честная бо реку, и отверзу от устен правая: яко истине поучится гортань мой, мерзки же предо мною устны лживыя. С правдою вси глаголы уст моих: ничтоже в них стропотно, ниже развращенно: Вся права суть разумевающим, и проста обретающим разум. Научу бо вас истине, да будет о Господе надежда вапша, и исполнитесь Духа.

Притчей чтение. [Главы 10 и 11.]

Уста праведнаго капают премудрость, язык же неправеднаго погибнет. Устне мужей праведных капают благодати, уста же нечестивых развращаются. Мерила льстивая мерзость пред Господем: вес же праведный приятен Ему. Идеже аще увидет досаждение: тамо и безчестие: уста же смиренных поучаются премудрости. Совершение правых наставит их, и поползновение отрицающихся упасет их: Не пользуются имения в день ярости, правда же избавит от смерти. Умер праведный, остави раскаяние: наручна же бывает и посмеятельна нечестивых пагуба. Правда непорочнаго исправляет пути, в нечестие же падает неправда. Правда мужей правых избавит их: безсоветием же пленяются беззаконнии. Скончавшуся мужу праведну, не погибнет надежда: похвала же нечестивых погибнет. Праведник от лова убежит,

вместо же его предается нечестивый. Во устех нечестивых сеть гражданином, чувство же праведных благопоспешное. Во благих праведных исправится град, и в погибели нечестивых радование: Во благословении правых возвысится град, усты же нечестивых раскопается. Ругается гражданином лишенный разума, муж же мудрый безмолвие водит.

Премудрости Соломоновы чтение. [Глава 3.]

Праведных души в руке Божией, и не прикоснется их мука: Непщевани быша во очесех безумных умрети, и вменися озлобление исход их: И еже от нас шествие сокрушение, они же суть в мире. Ибо пред лицом человеческим, аще и муку примут, упование их безсмертия исполнено: И в мале наказани бывше, великими благодетельствовани будут, яко Бог искуси я, и обрете их достойны Себе. Яко злато в горниле искуси их, и яко всеплодие жертвенное прият я. И во время посещения их возсияют: и яко искры по стеблию потекут: Судят языком, и обладают людьми, и воцарится Господь в них во веки. Надеющиеся Нань разумеют истину, и вернии в любви пребудут Ему. Яко благодать и милость в преподобных Его, и посещение во избранных Его.

На литии стихира храма: И преподобному стихире, глас 1:

Киими похвальными венцы * венчаим подвижника великаго, преподобнаго Серафима? * Той бо яко наставник добрый * в твердости веры и добродетели явися, * богодухновенными учении и равноангельным житием * приходящия к нему научая. * Темже вопием ему: * молися, преподобне, Христу Богу, * православную веру утвердити и душам нашим спастися.

Приидите, инок множества, * днесь преподобнаго благочестно восхвалим, * истиннаго ученика Спасова, * мирскую прелесть поправшаго, * ярем Христов на рамо взявшаго, * и полки бесов посрамившаго: * к немуже возопиим сице: * не забуди нас, отче Серафиме, * восхваляющих и чтущих святую память твою.

Светлая и божественная память твоя, преподобне Серафиме, * удиви всех, яко безплотен бо, * во плоти враги невидимыя посрамил еси: * вся же страна Тамбовская и святая обитель Саровская, * имущи твоя святыя мощи, * хвалится, сими бо здравие всем с верою притекающим * к честней твоей раце подается. * Темже, просветившися тобою, вопием ти, преподобне: * моли спастися душам нашим.

Слава, глас 5:

Радуйся днесь, вся Российская земле, * и святая обитель Саровская, * веселися. Верных же множества, * стекшися днесь, прославим преподобнаго отца, * пастыря и учителя, * богомудраго наставника заблуждшим, * скорога всех болящих целителя, * Российския земли великое украшение, * егоже похваляюще сице рцем: * преподобне Серафиме, * спаси нас молитвами твоими.

И ныне, Богородичен, глас тойже:

Храм и Дверь еси, * Палата и Престол Царев, * Дево Всечистая, * Еюже Избавитель мой, Христос Господь, * во тьме спящим явися, * Солнце Сый правды, * просветити хотя, * яже созда по образу Своему рукою Своею. * Темже, Всепетая, * яко Матерне дерзновение к Нему стяжавшая, * непрестанно моли спастися душам нашим.

На стиховне стихиры, глас 5.

Подобен: Радуйся, живоносный Кресте:

Радуйся, ангелом собеседниче, преподобне Серафиме, * благочестно бо на земли пожив, * многи приходящия к тебе страху Господню поучал еси: * благодатию Пресвятаго Духа озаряемь, * зрел еси будущая, яко настоящая, * и умиления и радости многи скорбящия душею исполнял еси. * Темже молим ти ся, * молися Господеви о чтущих тя.

Стих: Честна пред Господем смерть * преподобных Его.

Радуйся, заблуждших учителю предивный, * Христа Господа во храме со архангелы и ангелы видети сподобивыйся. * И ныне, преподобне, на небесех Того зрения выну наслаждаяся, * молися о нас, * верою творящих память твою.

Стих: Блажен муж бояйся Господа, * в заповедех Его восхощет зело.

Радуйся, преподобне Серафиме, * всем бо хранити истинную веру Христову заповедал еси, * и вышняго жития вожделев, * богатство возненавидел еси: * ныне же неизреченную красоту небесную зриши, * и сладкаго пения ангельскаго наслаждаешися. * Темже молися Господеви * даровати нам мир и велию милость.

Слава, глас 6:

Преподобне отче Серафиме, * кто исповесть труды твоя и болезни, * или кий язык изречет жестокое пустынное твое житие, * бдение же и пощение, * еще же и в затворе пребывание, * устен безмолвие и моление непрестанное? * Воистинну явился еси постником украшение, * молитвенник к Богу непостыдный. * Темже к тебе вопием: * радуйся, иноческаго жития правило: * радуйся, в бедах и скорбех великое утешение * и теплый всем предстателю: * молися, преподобне, спастися душам нашим.

И ныне, предпразднства,

Да возрадуется пустыня Иорданова, * и да процветет яко крин: * глас бо вопиющего услышан бысть в ней, * уготовайте путь Господень: * горы бо поставивый ставилом, * и удолия мерилом, * вся исполняй яко Бог, * крещается от раба. * Обнищавати начат богатныя дары даруяй. * Услыша Ева, * в печалех родиши чада: * ныне же услыша Дева: * радуйся обрадованная, * Господь с Тобою, * имей велию милость.

или Богородичен:

Творец и Избавитель мой, Пречистая, * Христос Господь, * из Твоих ложесн прошел, * в мя Оболкийся, * первая клятвы Адама свободи. * Темже Ти, Всечистая, * яко Божии Матери же и Деве воистинну, * вопием немолчно: * радуйся Ангельски, * радуйся, Владычице, * Предстательство и Покрове * и Спасение душ наших.

Тропарь преподобнаго, глас 4:

От юности Христа возлюбил еси, блаженне, * и Тому единому работати пламенно вожделев, * непрестанною молитвою и трудом в пустыни подвизался еси, * умиленным же сердцем любовь Христову стяжав, * избранник возлюблен Божия Матере явился еси. * Сего ради вопием ти: * спасай нас молитвами твоими, Серафиме, преподобне отче наш.

Богородичен, глас 4:

Еже от века утаенное, * и ангелом несведомое таинство: * Тобою Богородице
сущым на земли явися Бог, * в неслитном соединении воплощаемъ, * и крест волею
нас ради восприим, * имже воскресив первозданнаго, * спасе от смерти души наша.

НА УТРЕНИ.

На **Бог** Господь, тропарь святого, дважды. Слава, и ныне, предпраздства, или Богородичен: Еже от века утаенное:

По 1-м стихословии седален, глас 4:

Знамением крестным * и молитвою вражия искушения победив, * постом и воздержанием Господеви благоугодил еси: * темже чудес приял еси дар, * всем исцеления подавая, * верою притекающим к раце мощей твоих, Серафиме преподобне: * моли Христа Бога, * грехов оставление даровати * чтущим любовию святую память твою. [Дважды.]

Слава, и ныне, Богородичен:

Ужасно чудо зачатия, * и несказанен образ рождества * в Тебе познася, Приснодево Чистая, * ужасает мой ум, и удивляет помышление: * слава Твоя, Богородице, * всем простресея во спасение душ наших.

По 2-м стихословии седален, глас 1:

Во глубине пустыни Саровския колена * приклонял еси на камени, * воздевая преподобней твои руке ко Господу: * темже от Спаса благодать Святого Духа приял еси, * страждущия телесы исцеляти * и души верных просвещати. * Сего ради вопием ти: * моли, преподобне, Христа Бога спастися нам, * празднующим святую память твою. [Дважды.]

Слава, и ныне, Богородичен:

Молитву приемши от нас, * в кров Твой, Пречистая Дево, * прибегающих, * не престай молящи Человеколюбца * спастися рабом Твоим.

По полиелеи седален, глас 7:

Просия добродетельное житие твое, преподобне, * ныне в Российстей земли, * и от всех песньми похвальными славишия: * ты бо, яко Илия на колесницу добродетелей вшед, * на небеса душею возлетел еси * и тамо праведно пресветлым венцем венчался еси. * Темже благодаряще вопием ти, блаженне Серафиме: * моли Христа Бога, * грехов оставление даровати * чтущим любовию святую память твою. [Дважды.]

Слава, и ныне, предпраздства,

Да возрадуется пустыня Иорданова, * и да процветет яко крин: * глас бо вопиющего услышан бысть в ней, * уготовайте путь Господень: * горы бо поставивый ставилом, * и удолия мерилом, * вся исполняяй яко Бог, * крещается от раба. * Обнищавати начат богатныя дары даруяй. * Услыша Ева, * в печалех родиши чада: * ныне же услыша Дева: * радуйся обрадованная, * Господь с Тобою, * имей велию милость.

или Богородичен:

Пречистая Дево, помилуй нас, * прибегающих верою к Тебе милосердней * и просящих теплаго Твоего заступления: * яко Мати Бога Вышняго, * моли Сына Твоего, Христа Бога нашего, * спастися рабом Твоим.

Степенна, глас 4. Антифон 1-й, ихже стихи повторяюще поем:

От юности моя * мнози борют мя страсти, * но Сам мя заступи, * и спаси Спасе мой.

Ненавидящии Сиона, * посрамитесь от Господа, * яко трава бо огнем * будете изсохше.

Слава и ныне: Святым Духом * всяка душа живится, * и чистотою возвышается, * светлеется Троическим Единством священнотайне.

Прокимен, глас 4

Прокимен: Честна пред Господем смерть * преподобных Его.

Стих: Что воздам Господеву о всех, яже воздаде ми?

Евангелие от Матфея, зачало 43. [Мф. 11, 27–30.]

Рече Господь: Вся Мне предана суть отцем Моим: и никтоже знает Сына, токмо отец: ни Отца кто знает, токмо Сын, и емуже аще волит Сын открыти. Приидите ко Мне вси труждающиися и обремененнии, и Аз упокою вы: Возмите иго Мое на себе и научитесь от Мене, яко кроток есмь и смирен сердцем: и обрящете покой душам вашим: Иго бо Мое благо, и бремя Мое легко есть.

По 50-м псалме стихира, глас 6:

Днесь, вернии, духовно торжествующе * в нарочитом празднице преподобнаго отца, * и благочестно радующеся, * тому тепле возопиим: * радуйся, Серафиме блаженне: * радуйся, небесный человеке и земный ангеле: * радуйся, многих на путь спасения наставивый: * радуйся, верным похвало и Российстей земли утверждение: * молися о душах наших.

Канон предпразднства на 6, аще же несть предпразднства, канон Богородице параклисис, со ирмосом на 6, и святому два канона на 8.

Канон первый, глас 6.

Песнь 1.

Ирмос: Яко по суху пешешествовав Израиль * по бездне стопами, * гонителя фараона * видя потопляема, * Богу * победную песнь * поим, вопияше.

Господи отверзи мои недостойней устне, и даждь ми слово разума, воспети достойно память блаженнаго Серафима, ныне со ангелы молящагося Тебе, избавити нас от всякаго лютаго обстояния.

К Богородице великий молитвенник был еси, преподобне, Юже видети со апостолы сподобился еси: и ныне не престай молитвами твоими посещати чад твоих.

От юности твоя, преподобне, предался еси умом Богови, и страсти телесныя крепким воздержанием укротив, всякими добродетельми украсился еси, премудре.

Богородичен: Всеблагая Владычице, Яже Преплагаго Бога плотию рождши, озлобленное страстьми мое сердце очисти, да верою и любовию величаю Тя.

Ин канон, глас 8.

Песнь 1.

Ирмос: Воду прошед яко сушу * и Египетскаго зла избежав, * израильтянин вопияше: * Избавителю и Богу нашему поим.

По заповеди Владыки Христа узким и тесным путем вшел еси, преподобне, в Царство Небесное, широкий и пространный путь возненавидев: и ныне молися о нас, творящих пресветлую память твою.

От юности на безстрастия гору возшед и крест свой взем, невозвратно Христу последовал еси: и духовную мудрость стяжав, горняго Иерусалима достиг еси, преподобне: моли о нас единого Человеколюбца.

Ныне предстоя, преподобне, престолу Божию, молися о стране нашей избавитися от нашествия иноплемennых, и христоролюбивым людем земли Российския спасение испроси молитвами твоими, преподобне.

Богородичен: **С** верою и любовию притекающих к Тебе и со страхом поющих Тя молитвенный глас услыши, Владычице.

Катавасия по Уставу.

Песнь 3.

Ирмос: **Н**есть свят, * якоже Ты, * Господи Боже мой, * вознесый рог верных Твоих, Блаже, * и утвердивый нас на камени * исповедания Твоего.

Молитвами твоими, преподобне, предстоя Богу со ангелы, за весь мир молися, брани вражия потребити и победу на супостаты даровати.

От юности верою и любовию прилепился еси Владыце вышних сил, преподобне Серафиме: и возсияв в пустыни Саровстей, яко солнце, в скорбех приходящим к тебе утешитель был еси: моли спастися нам.

Явился еси, преподобне, молящимся тебе столп непоколебимь и прибежище всем притекающим во обитель Саровскую и приемлющим исцеления благодать неоскудную.

Богородичен: **У**слыша Ева праматерь: в печалех родиши чада. Ты же, Чистая Дево, услышавши: Господь с Тобою, радуйся: радованным гласом печаль праматере потребила еси.

Ин.

Ирмос: **Н**ебеснаго круга * верхотворче Господи, * и Церкви Зиждителю, * Ты мене утверди в любви Твоей, * желаний краю, верных утверждение, * едице Человеколюбче.

Молися, блаженне, Христу Богу избавитися нам от глада и пагубы, от напрасныя смерти, от тайных прегрешений и помышлений лукавых, да чистым сердцем Христу возопиим: молитвами преподобнаго спаси нас, Господи.

Кротостию и смирением последуя Владыце Христу, всем вся воистинну был еси, богатых же и убогих неослабно благочестию поучая, будущая яко настоящая провидел еси: моли Христа Бога, преподобне, согрешений наших оставление даровати.

Избави обитель твою, преподобне, от всякаго навета вражия и исполни ю любви и благодати, еже не помышляти о житейских, но душеспасительныя достигнути доброты молитвами твоими.

Богородичен: **У**пование и надежда наша Ты еси, Пресвятая Владычице, спаси державу православную и люди Твоя молящияся и имя Твое призывающия.

Седален, глас 4:

Житейское море * страстей воздержанием препобедив * и в пристанище безстрастия притек, * сосуд воздержания явился еси, преподобне Серафиме: * моли Христа Бога * даровати нам велию милость. [Дважды.]

Слава, и ныне, предпразднства,

Подобен: Гроб Твой, Спасе:

Великий дождь к речным струям предгрядет, * плотию крестится восхотев. * К Немуже божественный Предтеча ужасаяся глаголаше: * како крещу Тя скверны не имуща весьма? * Како простру мою десницу на главу, * еяже трепещут всяческая?

или Богородичен:

Егда предстану пред лицом * Создателя моего в день праведнаго суда Его, * тогда, Владычице, * предстани ми и муки избави мя вечныя, * да не сиду во ад, * но да спасуся Твоим, * Пресвятая Богородице, заступлением.

Песнь 4.

Ирмос: Христос моя сила, * Бог и Господь, * честная Церковь * боголепно поет взывающи, * от смысла чиста * о Господе празднующи.

Днесь светло празднует Саровская обитель память твою, преподобне, и молит тя: испроси у Господа вселенней мир и душам нашим велию милость.

Великими подвиги твоими, преподобне, яко финикс процвел еси, словесы благоплодными и непорочным житием сердца притекающих к тебе услаждая: и ныне убо молися, да обрящем милость у Христа Спаса нашего.

Твоими молитвами о нас умоли Бога, преподобне Серафиме, и греховный мрак печали нашея разори: безстрастием, верою и любовию украси всех, преславную память твою чтущих.

Богородичен: Радуйся, Владычице Дево, Церквам красото, благочестивым людем державо и похвало: непрестанно молися Христу Богу, да сохранит нас от бед молитвами Твоими.

Ин.

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Не токмо святая обитель Саровская, но и вся Российская земля имеет тя, блаженне, молитвенника теплаго и скорого помощника, крепкаго и непобедимаго заступника и ходатая о душах наших.

Буди о нас молебник и ходатай ко Пресвятей Троице, и подвижни на молитву с тобою лики святых, ихже житию поревновал еси, преподобне: с нимиже купно молися о мире и устройении всего мира, да тихое и безмолвное житие проживем в веце сем, и в будущем жизнь вечную наследуем.

В постницех велик быв, преподобне, тесное иноческое в пустыни житие проходил еси, и сие во умиленней молитве скончал еси: моли спастися нам.

Богородичен: Ты еси, Пречистая Богородице, прибежище наше и утверждение, моли Сына Твоего и Бога нашего подати нам спасение и грехов оставление.

Песнь 5.

Ирмос: Божиим светом Твоим, Блаже, * утренюющих Ти души * любовию озари, молюся, * Тя ведети, Слове Божий, * истиннаго Бога, * от мрака греховнаго взывающа.

Всем приходящим к тебе был еси учитель истинный, и к Богородице великий молитвенник: и ныне, преподобне, не престаи моляся о чадах твоих, яко имаши дерзновение велие.

Да внидут ныне христоименитии людие во храм обители Саровския, к честным мощем твоим, преподобне Серафиме, припадающе, и да просят от тебе исцеления, здравия и спасения, Христа величающе.

В нощи молящу ти ся Богу, преподобне, враг невидимый хотяше устрашити тя, но молитвою твоею посрамлен, исчезе вселукавый.

Богородичен: Бога, Егоже родила еси, Пречистая Марие, моли, рабом Твоим подати прегрешений оставление.

Ин.

Ирмос: Просвети нас повелении Твоими, Господи, * и мышцею Твоею высокою * Твой мир подаждь нам, * Человеколюбче.

Постом и непрестанною молитвою прославил еси, преподобне, обитель Саровскую, елеем от иконы Владычицы помазуя недужныя и тем исцеление неоскудно подавая: и ныне молися спастися душам нашим.

Святителие и священницы сорадуйтесь иноком Саровским, и простии людие вкупе воспойте блаженнаго отца, обуреваемых скорбьми тихое пристанище, врача душевным и телесным недугом скорого.

Принеси молитвы твоя, преподобне, яко жертву благоприятну и непорочну ко Пресвятей Троице, и не забуди нас, ныне творящих память твою: милость испроси ненавидящим, обидящим и враждующим на нас, и избави всех от всякия скорби.

Богородичен: Управи ум мой, Владычице, обуреваемый страстьми многими: спаси, Богородице, к Тебе прибегающия, иныя бо помощи, Чистая, разве Тебе не знаем.

Песнь 6.

Ирмос: Житейское море * воздвигаемое зря * напастей бурю, * к тихому пристанищу Твоему притек, воию Ти: возведи от тли живот мой, * Многомилостиве.

Святая душа твоя обитель бысть Богу, в нейже Отец, Сын и Святыи Дух вселися: темже молим тя, преподобне, наваждения вражия от чтущих тя отжени, и верным людем мир и здравие даруй.

Великия твоя пустынные подвиги и труды и сладость учения твоего почитаем, преподобне Серафиме, имиже многия приходящия к тебе просветил еси и научил еси воспевати Единосущную Троицу.

Житием чистым последовал Владыце Христу, течение доброе скончал еси, преподобне: к вечным же обителем возшед, блаженне, зриши тамо, яже ангели видят: темже, чтуще память твою, Христа величаем.

Богородичен: Ныне к Тебе прибегаю, Пречистая, спаси мя молитвами Твоими и соблюди: елика бо хоцещи, можещи, яко Мати Всемогущаго.

Ин.

Ирмос: Молитву пролию ко Господу, * и Тому возведу печали моя, * яко зол душа моя исполнися, * и живот мой аду приближися, * и молюся яко Иона: * от тли, Боже, возведи мя.

Грехов исполнени вси есмы, твоя же молитвы, преподобне Серафиме, яко кадило благовонно, ко Господеву восходят. Ныне молим тя: волнующееся в земли нашей море злаго неверия иссуши, и спасение душам нашим от Господа испроси.

Блажен воистинну был еси, преподобне Серафиме, нищетою богатство и плачем радость стяжав, юже приходящим обильно подавал еси: и ныне лучи чудес источаеши, и исцеляеши всех, с верою к тебе притекающих.

В пустыни кладенец ископав твоима рукама, преподобне, приходящая жаждущия люди напоил еси, и ныне многим недужным водою кладенца сего болезни исцеляеши: воистинну дивнаго молитвенника и чудотворца всем, преподобне, Владыка ты показа.

Богородичен: Воистинну Тя Матерь Божию исповедуем, истинную Богородицу, Твоим бо Рождеством тленнаго осуждения избавихомся, милосердия ради Человеколюбца Бога, и к жизни нетленной воззвани быхом.

Кондак, глас 2:

Мира красоту и яже в нем тленная оставив, преподобне, * в Саровскую обитель вселился еси: * и тамо ангельски пожив, * многим путь был еси ко спасению: * сего ради и Христос тебе, отче Серафиме, * прослави, и даром исцелений и чудес обогати. * Темже вопием ти: * радуйся, Серафиме, * преподобне отче наш.

Икос: Оставив род и други, богатство яко прах вменив, в пустыни Саровстей водворился еси: и на страсти яко безплотен подвизався, ангелов ликостояния сподобился еси. Темже духовная разумения приим, подаждь и нам, преподобне, разумно песньми воспети тя, сице глаголющим: радуйся, Серафиме блаженне, небесный человеке и земный ангеле: радуйся, в любви Христу подражателю. Радуйся, Святаго Духа обитель: радуйся, унывающим велие радование. Радуйся, источниче исцелений: радуйся, скорбящим душам сладкое утешение. Радуйся, иноком тихое пристанище и учителю премудрый: радуйся, похвало земли Российския: радуйся, Серафиме, преподобне отче наш.

Песнь 7.

Ирмос: Росодательну убо пещь содела ангел * преподобным отроком, * халдеи же опаляющее веление Божие * мучителя увеща вопити: * благословен еси, Боже отец наших.

Чудно житие твое явися, преподобне, благодатию Божественнаго Духа исполнено: блаженну воистинну кончину праведных приял еси, о Христе радуяся: мы же к Прославльшему тя взываем: отец наших Боже, благословен еси.

Множество людей во святую обитель сошедшесе днесь, преподобне Серафиме, честным мощем твоим покланяется, от нихже исцеления вси почерпаем, непрестанно зовуще: отец наших Боже, благословен еси.

Во всю землю изыде вещание сие, яко в Сарове чудотворец преславлен явися, исцелений множество источая всем с верою приходящим и вопиющим: отец наших Боже, благословен еси.

Богородичен: Богородице Дево, рождающая Слово паче слова, Зиждителя Твоего, Того моли с преподобным Серафимом, помилуй души наша.

Ин.

Ирмос: От Иудеи дошедше отроцы, * в Вавилоне иногда * верою Троицкою пламень пещный попраша, поюще: * отец Боже, благословен еси.

Помилуй нас, Господи, и от всякаго зла душетленного сохрани молитвами угодника Твоего, преподобнаго Серафима, да вси умильно вопием Ти: отец наших Боже, благословен еси.

Кто не почудится, кто не прославит неизследимую глубину милосердия Твоего, Господи, яко явил еси всему миру угодника Твоего, преподобнаго Серафима, молитвенника теплаго о нас вопиющих Тебе: отец наших Боже, благословен еси.

Благодарное сие пение, от нас приносимое тебе, преподобне Серафиме, приими, и всем нам, празднующим святую память твою и покланяющимся раце мощей твоих, исцеление даруй, вопиющим: отец наших Боже, благословен еси.

Богородичен: Ты еси, Пресвятая Богородице, прибежище наше и утверждение: моли Сына Твоего и Бога нашего подати нам спасение и грехов оставление.

Песнь 8.

Ирмос: Из пламене преподобным росу источил еси * и праведнаго жертву водою попалил еси: * вся бо твориши, Христе, токмо еже хотети, * Тя превозносим во вся веки.

Плотския страсти укротив и мирови умертвився, глаголы жизни вечныя сердцем твоим, блаженне приял еси, научая всех к тебе притекавших взывати: Господа пойте, дела, и превозносите Его во веки.

В прославлении честных мощей твоих, преподобне, обитель Саровская радости исполнися: людие же вси дивному во святых Своих Богу взываху: Господа пойте, дела, и превозносите Его во веки.

Благодатию Божественнаго Духа исполнен сый, преподобне Серафиме, верным людем, творящим святую память твою, молитвами твоими испроси грехов прощение, вопиющим: дети благословите, священницы воспойте, людие превозносите Господа во веки.

Богородичен: Спасения Ходатаица нам явилася еси, Богородице, рождающая Спаса и Владыку всех: темже молим Тя, спасения сподоби всех песнословящих Тя верно во вся веки.

Ин.

Ирмос: Царя Небеснаго, * Егоже поют вси ангельстии, * хвалите и превозносите во вся веки.

Добродетельному житию твоему, преподобне, позавидев враг вселукавый, восхоте запятие тебе сотворити: ты же, благодатию Божиею и молитвами Владычицы посрамив того, Бога прославил еси, песнословя: Господа пойте, дела, и превозносите Его во веки.

Яко молния блистающися светится на поднебесней, тако и вещания о твоих, преподобне, чудесех во всю землю изыдоша. Мы же, дивящися славе твоей, вопием: дети благословите, священницы воспойте, людие превозносите Господа во веки.

Благословим Отца и Сына и Святаго Духа, Господа.

Суетными и страстными помышлениями мятущийся ум наш исцели, преподобне, волны злаго неверия в земли нашей укроти, разслабленная житейскими попечениями сердца наша укрепи, да славим Христа Содетеля во вся веки.

И ныне, Богородичен: Радуйся, престоле Господень огнезрачный: радуйся, заре невестственного блистания: радуйся, облаче возсиявшего солнца праведного, Христа Спаса нашего, Егоже превозносим во вся веки.

Песнь 9.

Ирмос: Бога * человеком невозможно видети, * на Негоже не смеют чини ангельстии взирати: * Тобою же, Всечистая, явися человеком * Слово воплощено: * Егоже величающе, * с небесными вои * Тя ублажаем.

Недостойными усты воспеваемое тебе малое хваление наше, преподобне, не презри, но прими: и всех прославляющих тя освяти, бед и напастей и вечного мучения избави, да ты присно воспеваем.

Мраз ночный и вар дневный во уединении пустынном доблественно претерпев, дом премудрости Божия был еси и к сиянию невечернему востекл еси: моли спастися нам.

Славится днесь обитель, в нейже ярем Христов прияти изволил еси: тамо бо в пустыни дни твоя пребыл еси, и твоими ученьми многи приходящия к тебе вразумив, научил еси быти чада Церкви Христовы.

Богородичен: Ты еси крепость наша, Ты еси похвала и радование, хранительница наша, заступление, прибежище и предстательница непобедимая: Пречистая Богородице, спаси рабы Твоя.

Ин.

Ирмос: Воистинну Богородицу * Тя исповедуем, * спасеннии Тобою, Дево Чистая, * с безплотными лики * Тя величающе.

Великим отцем, древле в посте и подвизах просиявшим, поревновав, преподобне, чрез вся дни живота твоего в молитве, слезах и трудах пребыл еси, дондеже достигл еси небесныя обители: темже ты достойно ублажаем.

Крепкою силою Христос Бог ты препояса и укрепи победати козни демонския, преподобне. Темже ныне молим тя: моли Человеколюбца Бога, да избавит всех нас от вражиих находений и искушений, и спасет души наша.

В болезнях и скорбех наших к тебе, преподобне, прибегаем и из глубины душевныя вопием: буди нам небурное пристанище и болезнем скорый целитель, и избави нас от всякаго недуга и нужды, да ты непрестанно величаем.

Богородичен: Единого от Святыя Троицы, Слова и Сына родила еси, Дево Пречистая, Егоже с преподобными и праведными моли о рабех Твоих, верою просящих грехов прощения.

Светилен.

Подобен: Жены, услышите:

Приидите, вси вернии, священными песньми восхвалим дивнаго в чудесех преподобнаго Серафима, новаго светильника Российския земли, ангелом собеседника и теплаго молитвенника к Богу о чтущих святую память его.

Слава, и ныне, предпраздства,

Подобен: Духом во святых:

Яко виде Тя обнажена Иордан, с трепетом к сущему от неплодове рече: остави, о Иоанне, креститися Господа, огнем и Духом очищающего всю тварь: на сие бо прииде, освятити земныя, и водное естество.

или Богородичен:

По Бозе упование имуща на Тя, Пречистая Богородице, молим Ти ся: Рождагоса из Тебе умоли даровати мир вселенней и велию милость.

На хвалитех стихиры на 6,

Предпраздства 3 и преподобному 3.

Аще же несть предпраздства, преподобному на 4, глас 8:

Приспе всечестный праздник обители Саровския, * память преподобнаго Серафима, * емуже ныне сице возопиим: * радуйся, постником светило и утверждение, * иноком звездо, * якоже волхвом, показующая путь в небесныя обители, * священником похвало преславная, * любве и целомудрия источниче неизсякаемый, * светильниче пресветлый духовнаго разсуждения: * радуйся, правило добродетелем великое. [Дважды.]

Блаженне отче Серафиме, * Христови воистинну последовал еси, * братолюбием и незлобием всех к себе привлекая, * кротостию же и смирением многи добродетельному пути научая. * Темже любовию память твою, * преподобне Серафиме, ублажаем.

В пустыню вселился еси, преподобне, * и тамо исполнился духовныя премудрости, * на высоту добродетели возшел еси. * Темже вопиим ти: * радуйся, церковное украшение, * священником доброе утешение, * иноком благолепие и похвало, * Серафиме блаженне: * моли Христа Бога мир вселенней даровати * и душам нашим велию милость.

Слава, глас 6:

Приидите иноков собори * и постников сословие, * приидите христоименитых людей множества, * песньми истиннаго постника почтим, вопиюще: * радуйся, по стопам Владыки Христа узким путем управляемый, * и притекающим к тебе в бедах и скорбех скорый помощниче, * и спасения ходатаю предивный: * радуйся, даром пророчества украшенный, * прорицай яко настоящая грядущая: * молися, преподобне Серафиме, * о чтущих верою и любовию * святую память твою.

И ныне, предпраздства,

Воспойм, людие, рожденному от Девы, * и в реце крещшемуся Иордане, * и к Нему возопиим: * Царю всякия твари, * даруй нам неосужденно чистою совестью, * верно достигнути * Твое святое * из мертвых * тридневное востание.

или Богородичен:

Богородице, Ты еси лоза истинная, * возрастившая нам Плод живота: * Тебе молимся, молися, Владычице, * со святыми апостолы, * помиловати души наша.

Славословие великое, и отпуст.

НА ЛИТУРГИИ.

Блаженны от канона первого песнь 3-я, и второго канона песнь 6-я.

Молитвами твоими, преподобне, предстоя Богу со ангелы, за весь мир молися, брани вражия потребити и победу на супостаты даровати.

От юности верою и любовию прилепился еси Владыце вышних сил, преподобне Серафиме: и возсияв в пустыни Саровстей, яко солнце, в скорбех приходящим к тебе утешитель был еси: моли спастися нам.

Явился еси, преподобне, молящимся тебе столп непоколебимь и прибежище всем притекающим во обитель Саровскую и приемлющим исцеления благодать неоскудную.

Услыша Ева праматерь: в печалех родиши чада. Ты же, Чистая Дево, услышавши: Господь с Тобою, радуйся: радованным гласом печаль праматере потребила еси.

Грехов исполнени вси есмы, твоя же молитвы, преподобне Серафиме, яко кадило благовонно, ко Господеву восходят. Ныне молим тя: волнующееся в земли нашей море злаго неверия иссуши, и спасение душам нашим от Господа испроси.

Блажен воистинну был еси, преподобне Серафиме, ницетою богатство и плачем радость стяжав, юже приходящим обильно подавал еси: и ныне лучи чудес источаеши, и исцеляеши всех, с верою к тебе притекающих.

В пустыни кладенец ископав твоима рукама, преподобне, приходящая жаждущия люди напоил еси, и ныне многим недужным водою кладенца сего болезни исцеляеши: воистинну дивнаго молитвенника и чудотворца всем, преподобне, Владыка ты показа.

Воистинну Тя Матерь Божию исповедуем, истинную Богородицу, Твоим бо Рождеством тленнаго осуждения избавихомся, милосердия ради Человеколюбца Бога, и к жизни нетленной воззвани быхом.

Тропарь преподобнаго, глас 4:

От юности Христа возлюбил еси, блаженне, * и Тому единому работати пламенне вожделев, * непрестанною молитвою и трудом в пустыни подвизался еси, * умиленным же сердцем любовь Христову стяжав, * избранник возлюблен Божия Матере явился еси. * Сего ради вопием ти: * спасай нас молитвами твоими, Серафиме, преподобне отче наш.

Кондак, глас 2:

Мира красоту и яже в нем тленная оставив, преподобне, * в Саровскую обитель вселился еси: * и тамо ангельски пожив, * многим путь был еси ко спасению: * сего ради и Христос тебе, отче Серафиме, * прослави, и даром исцелений и чудес обогати. * Темже вопием ти: * радуйся, Серафиме, * преподобне отче наш.

Прокимен, глас 7:

Прокимен: Честна пред Господем смерть * преподобных Его.

Стих: Что воздам Господеву о всех, яже воздаде ми?

Апостол к Галатом, зачало 213. [Гал. 5, 22 – 6, 2.]

Братие, плод духовный есть любы, радость, мир, долготерпение, благость, милосердие, вера, кротость, воздержание: на таковых несть закона. А иже Христовы

суть, плоть распяша со страстьми и похотьми. Аще живем духом, духом и да ходим. Не бываем тщеславни, друг друга раздражающе, друг другу завидяще. Братие, аще и впадет человек в некое прегрешение, вы духовнии исправляйте такового духом кротости: блюдый себе, да не и ты искушен будеши. Друг друга тяготы носите, и тако исполните закон Христов.

Аллилуиа: Блажен муж бояйся Господа:

Евангелие Луки, зачало 24. [Лк. 6, 17–23.]

Во время оно, ста Иисус на месте равне: и народ ученик Его, и множество много людей от всея Иудей и Иерусалима и помория Тирска и Сидонска, иже приидоша послушати Его и исцелитися от недуг своих, и страждущии от дух нечистых: и исцеляхуся. И весь народ искаше прикастися Ему: яко сила от Него исхождаше и исцеляше вся. И Той возвед очи Свои на ученики Своя, глаголаше: Блажени нищии духом: яко ваше есть Царствие Божие. Блажени, алчущии ныне: яко насытитесь. Блажени, плачущии ныне: яко возсмеетесь. Блажени будете, егда возненавидят вас человецы, и егда разлучат вы, и поносят, и пронесут имя ваше яко зло, Сына Человеческаго ради. Возрадуйтесь в той день и възиграйте: се бо мзда ваша многа на небеси.

Причастен: В память вечную будет праведник: